

Kotavaxak dem suterot

Panteleymon Romanov

**BAROY
MEGIDOL**

Berpotam (1923)

Kotava, tela tamefa golerava

KOTAVAXAK DEM SUTEROT

Panteleymon Romanov

BAROY MEGIDOL

Rossia vaf berpotam (1923)

Kalkotavaks : **Damien Etcheverry** (2016)

Panteleymon Romanov : rossia vaf suterotik (1884-1933)

Darekeon. Vielu uum ale toz tir, widikeem va neda tazukad aze va baroy korik libud : va Nikolay vukudiasik is Stepan is doltik.

Nikolay nope inafa rodepulvirapa is redura va yona someguzekana coba zo libur.

Stepan nope inafa glogavonucanya zo libur. Va kiewati ik malyada is miltuca mu kottan dun pulvir. Ison, tir teldanyaf. Tir djuprovwes va koncoba pu intik lodam meggruppen bettan.

Doltik rubackon zo libuyur. Neken pilkotik co zo rolibur, nedison da mea zo vidjeyer, voxen batcoba me sokiyir, kivason va yon jotik dimdenlapitis mal redjel. Batdume doltik zo dasugdar.

— In arientagruter neke tir beyasapaf, ~ widik kalid.

— Voldo beyasik someaskit, kiren ant mantan va kotcoba grukalir isu lize isu kane isu inde. Rotir, in va ant int vox dere doda flecutur.

— Kas gan intyon libunik zo keldaskic ? ~ korik ke vegungafa wida erud.

— Arse, cugeke. Baroy megidol, okon. Nararanya !

Libunik va ol pu sint walmunecked. Nikolay kan taka is yoy kobar. Va blira voldum kotlize djukugrustar. Nume va bunera va erava is azed vajuler.

— Dale tir to redura, ~ dun kalir. ~ Va skura, bet zersulik rodefaskir.

Voxen afrecker : va azed gu blira somedolaner. Loon mekase inaf reduks zo romalskur, pune sedme in batcoba lokiewon sovodar. Co wazder da in al kotaskirsir maneke metan grupartfir. Wazdecker da inafa taka kobanyar.

Tire taka kobackar. Kotvielon in koafinon ware rieter. Va data rieta dir eke flecur da kabdunedir, direvielon givulkuson va darevielaf kaliks.

— Ex, oretlik ! ~ tawadayik iegad, ~ va vole arinton kaliyil !

— Va kotcoba setikec, win ! ~ Nikolay dulzavar. ~ Blovuc, do tanoya coba, solve jin va kotcoba gotrakú.

Tore in va wida gu kelu tanvordon djumartazukar. Sedme in, milgikafa bema is intanyofaxe is tawopafa tavera is sanexe is blatmidurafa tavera aze wenyaxe fiste di zo fenkud. Isen bata kotcoba miledje is millize ta gojuca me di tir.

— Voxen toklizu va erba naritil ? ~ widik erud.

— Drikafa ! Sotre tanoy talolkam ke kot korik, va milgikafa bema daditic.

— Isen icde intanyofaxe ?

— Drikafa ! Sotre toloy talolkam ke kottan, numen batcoba titir.

— Isen icde tawopafa tavera, baroy ape gotitid ?

Direvielon bema is tavera tid jovleyena kiren rieta ke Nikolay arliz al malfid. Widik gandid, trakuson da tanoy talolkam azu toloy azu baroy koe intaf ucom zavzagid. Va lofa

torigira va Nikolay pestaled kiren in en pulvinyir neken gu mecoba zo gododer.

Bata betara ke rietem ke Nikolay nekir da va azed pu kot nik keldon kakeven dun pulvir. Ede va mon sanoy xuye gamdar, pune ba siel pester boiken gu kota erava is cues dumedede remi safta kotmielon is kotafizon co kobayar.

— Tokinde rinafa taka va kota batcoba acagir ? ~ widik erud.

— Inde rotaskí, batugale goflecú, ~ Nikolay dulzer. ~ Re icle, fela va min pulvid.

Isen ageltafa. Lana fela al suter da koe mana wida kona milgikafa bema is sanexe is blatmidurafa tavera ikz- su zo fenkud. Batcoba va Nikolay malfir, i va Nikolay pulviyis va dilintyon azed pu Utcaneda. Taneatisik pu Meokneda wetce koncoba bokayasa silukon al pulvir. Taneatisik va Meokneda pu taneatisik va Kolaneda wetce koncoba skuyusa azon al pulvir, trakuson da warzot va widava radimi tena ke arienta di artfir. Isen taneatisik ke Bowereneda va azed wetce coba kevskuyuna pu fela pulvir.

Korik osk va mek vetuig nope remtegira ke Nikolay torigid, voxosk va konaka wentaca dace malnarid. Tulon Nikolay levgon gorar da burmotaxo ke pilkotik ta vevedura va bema zo gogriksead. Nume balte zo dimvegedud, voxen bema me di zo bokar solve Nikolay warzon rieter.

Battode norkaxa zavzad nuyafa.

Neken kottan va norkaxa olegon gu exoma godedadir.

Viele Nikolay va sanegafe nevaxe djukukolnar, koaykason va kottan gu balemoy talolkam, pune bat balemoy talolkam me zo divucomad kiren beta norkaxa mea zo trasir.

Nikolay va norkaxemaxo worar nume tire rabater da mea tanoy olkoy tir.

— Baix, xabe norkaxa ! ~ kalir. ~ Va mane nevaxe olegat solve va dotafe kolavaxe me dadit ? Dum metcates oretlik blit.

Sin va nevaxe jovled.

— To ara arienta tir, ~ guazik kalid. ~ Ko kolavaxe kottan va int djukatcater numen batcoba tir kiewaca.

— Batcoba ape fu zo stegevar ? ~ kontan erur.

— Volgue, ~ Nikolay dulzer, ~ va dentemaxe ke pilkotik fu artazukat. Va nikoyeem opelon deswat numen daneks di titir.

Nikoyeem zo deswad, azen viele dodelik erud va coba ware di gonaskid, zunenon diviegar :

— Benje, va tokcoba ware kevaneyac ? Va tokcoba ?

— Icede kolavaxe...

— Icede toke kolavaxe ?

— I dotafe.

— Va jin gu bate kolavaxe kostrursuc ! Va blira a kolavaxe al tiskic, voxe re va kone levgon olegac !

— Voxen me tiv soriaf.

— Me soriaf nek kugdas va jin !...

Kolavaxe nore zo jovler.

— Numen va nikoy ronariv ? ~ kontan vazon erur.

— Gue, ae.

— Battode va batooba kali imwugal fu iksantuv, numen xo titir cufo.

Libuson va Stepan sovetcoyes va kiewafa askira, kottan al trakur da in va erura va inta ta kolnara mevielu vewatar, larde tir sintaik.

Numen kottan va Stepan gikevlanir larde va koncoba dun olegar.

Isen, en, in va koncoba somevewar. Va teca sugda mo eluxaki kosuter aze va korik den doltik keldaskitis stakser.

Voxen kotviele va koncoba pu kontan kaxaar, pune artan zo duxar. Ede Stepan granser da kontan va jaftol solnarin bas bonoldolekik di mbi bulkar, pune i widik kumzilison mallanir, voxen moion bonoldolekik va lipimi nurudigisi va mil jaftol silukon erur nume me zo gokucilodar. Stepan zo funer da co govewar ise va kontel co puidar, nume va lipimi suter. Isen viele ilgaeles widik artlanir aze va lipi pu bonoldolekik nedir, bam bantan dere artlanir ise, lieke ilgaeles, va teli intafi icde mil jaftol nedir.

Viele uum va walzilira va jiomaaf tawayeem, Stepan tir taneik vanovas va rieta, kalis da digira va konak decitoy

desyatin welmalumolk gan tanoy korik tir memalyaca solve widamidusik va le aluboy sodadir.

Voxen viele diretaneavielon walzilira zo gorar, pune Stepan va jiomaik saar, i va ayik dere tis, nume dakter da sin vode goked.

— Viele, banlize, varafe sane al goratar, askitit milinde al kalitir ! Gokemet. Banlize korik va sint fure fu kabelcad.

— Voxen tokvieli goketet ? ~ kontel erur. ~ Va kona sinka mea dadiv !

— Tetce, mu rin va lipimi fu suté numen graltambik va regelta zilitir.

— Kle va lipi pu ant tanoy ke cin fu zilil numen arak va kutceem anton rofrineter !...

— Tokdume pu tanoy ke cin anton co zilil ? Pu aryon rozilil !

Azen yanesikeem va Stepan anamlanir. Kottan va lipimi kazawar aze ta malseotara va regelta den graltambik ekeyur.

— To in tir ayik, to glogik. Kire ae va koncoba pu bettel meviele al vewar, ~ widik kalid. ~ Koflison me al roklad.

— Narason va forendasik, someroklat !

Voxen arti sanoya wexa, graltambik vanvulter, bimulon kalison :

— Nanye, va lipi pu jin kalion zilil !! Edeme bat ocaj ke

vakol va jin fu turodad !

Isen loloon Stepan tir vonaf mu kottan, loloon toz zo ilkader ! Tere arti periodama, inaf antaf yolt va vogadarapa nekickir.

Doltik, nope eba, va askiputaca is satcon dotegira giviunsur. Va nutikye dise va ebeltaf pez is ronenuba mepebuson somadasa bal taltenuba uner.

Voxen bat doltik nuve amkepes va tanoy mukot anton flecur : i va tel intaf, vulkuson va askira va koncoba mu doda. Moni Pasxa jora, ko widava ta aneyara va doleks lakir voxe va tirda anton malstar, awe (tilerda en tir degutafa). Kot korik artlanir aze va bexa kodisuker lize moeon obla kum lukoptafa tilerda stokewed, aze uzad aze mallanid.

— Ede va int rotcatel, ede rotronal, kotcoba ~ Senka kalir.

— Kolavaxe me al zo vegebur, voxen va slika tilerda dadit.

Azen larde jontika is slika tilerda tir, pune doltik mu int toz kodoler. Erba ke bonoleem ke jiomaik, i ke bonol doleyen pu midusik, dere ko inaf ucom zo dear.

— Kas va kafadjo pu jin fu zilil ? ~ tawadayik dile erur, i ayik dodeyes va dro ke jaftol.

— Va toko kafadjo olegal ? ~ doltik kalir. ~ Banliz fu kosuté.

Va gamdama mo eluxaki tclar aze do jontiki oltavafi eluxakimi koucomar.

— Icle ede ko amidaf ucom co plekul, ~ tawadayik kalir. ~
Kas sini me fu aotcewed ?

— Kas va aptaf ucom sotre kot oretlik co godadí ? ~ doltik
dulzer. ~ Mana tapega co tir !

Voxen tire, fure, eluxakimi al aotcewed. Mea kontan va coba
dodeyena isu medodeyena rogruper. Numen daneks tir dumede
metan al doder kiren, re, viele erba ta kona lusterá zo gotrasir,
pune meka ware tir.

— Neken kas va eluxakimi bas cin me al naril ? ~ tawadayik
tanpudon diviegad.

— Gue, va sini al narí, ~ doltik dulzer.

— Va sugda al tcalal.

— Al tcalá.

— Ax, al tcalal ! Toklize kle tigid ?

— Tokcoba ?

— Eluxakimi dem gamda ?

— Tire, in ko ucomaj al narir...

— Maneke ijec ! To va winyoni eluxaki gic !! Kotcoba al zo
stragar, ageltac !!

Numen doltik va jontiki felayeyeni is guzeyeni eluxakimi
divucomar. Kottan disuker aze stivawer.

— Bubecker, oretlik...

— Sobuber ! Ax, ede va lana patara co grustav, pune va mana krodgrablera sini co askid ! Voxen va tokcoba gu erba al askil ?

— In al zo ixalar. Toklize gestac da tigur ?! Kas folic da al fixá ? Va winafa erba olegacká ! ~ iegar. ~ Ede va kafadjo me co nediyí, pune co rotiec, voxen larde kafadjo batlize tigid medume ronovijec !

— Va doleks gonageltav !! ~ kontel kalir.

— Ebokafa ! Ko dolta stal !! Ujabelisik pir aze di stujer !!

Sin va dolta kolanid, toz ageltad. Koe patarak, koe briz vas talolk is talolkam, bendeks al zo askir : « Baroy bulol ko ».

— In va jaftolxo al roklar ! ~ ujabelisik ton gelt blafotaf gu olaxa kildes moe briz kalir, askarason va taka dem ulingayan usuk div bergo ke kaftantacku.

Korik pokepon tigus van vertok takablagad.

— Lokiewon co gosuteyel, ~ azilkasik pu papeketik kalir. ~ Batliz va erbolc gobendeyé, pune va bulol al kosutel.

— Al roklá, banliz co gobendeyé... ~ papeketik dem ebeltaf pez kalir, madason va ronenuba fasiatason va kapray edje taltenuba madawer.

— Ape va nuba suteson al roklal... ~ Senka kalir.

— Loeke govul, ~ tan bewik ke tuzda kalir, ~é kiren ede va rin me co enintev, pune inc banliz kali imwugal va kon varaf bonoleem co vol rovokosutel.

— Kle ! kas kiewafa ? ~ arak vadimeon erur.

— Ant oretlik gruper ! Kotcoba zo aotceyer... Icde bulol lajudoplekuv, voxe icde erba me gildav.

— Kiren al roklayá nume kan gelt al relvá, ~ mevaleaf papeketik kalir.

— Co gorelveyel ! Edeme va varafa neva kan nubok laxurelval.

Kotviele doltik gu walzilira va taway mbi pulvir, i korik lusteyeson digis va tol-sanoy desyatin welmalumolk, pune kalir :

— Ta batcoba, va banlize gorara goket. Sin viunsud. Arbe mwa va mecoba rotaskit. Moida katanatad, bam, en ! Volsen va win meinde koaykav !

Ede kontan va lipimi ke Stepan vanburer, i va lipi erusi va narira va norkaxa tori mona, doltik gidulzer :

— To me tid. Tori bema zo nariyid.

— Voxen bema me tir.

— Me tir kiren va rigavara va kusk taneon al gorav.

— Voxen mek kusk tir.

— Ox, man oretlik karakes ! Pu Nikolay fu erul !!

Yanesik den Nikolay lanir.

— Kas va norkaxa ke grivegeduyuno burmotaxo al naril ?

~ Nikolay erur.

— Al naril.

— Battode, mandume va jin kostrul !

Daneks tir, kottan golde baroy korik dun mejer. Kotcoba sotir mal blifa taka ke Nikolay, taneon ; is mal gloganya ke Stepan, toleon ; is luriducapa ke doltik van tanoya nia, bareon.

— Bat oretlik vode co lavanpir tumtik lodame va sanegafa arienta viunsur, ~ lotel icde Stepan kalid.

— Bat rotapsanik va int ben ge ke doda al krud. Tokviele jotik mal redjel dimlapitid ?!

— Toktan va manyon korikaj mo win al inker ? ~ kon widik kalir.

— Cin, goxe ! Tok artan ? Ax, man korik sin tid !